

★ नमो नमो नमो नमो नमो नमो नमो नमो नमो नमो नमो ★

उत्तंग हमारऽ

अंगजनपद

उत्तंग

(अंगिका काव्य संकलन)

कवि :

होरा प्रसाद 'हरेन्द्र'

चन्द्रकान्ता प्रकाशन

कटहरा, भागलपुर (बिहार)

★ नमो नमो नमो नमो नमो नमो नमो नमो नमो नमो ★

उत्तंग हमरऽ 'अंग'

(काव्य-संकलन)



★ रचनाकार ★

हीरा प्रसाद 'हरेन्द्र'

चन्द्रकान्ता प्रकाशन

कटहैरा, भागलपुर

'मांछ' टाइटल पांच

कृति :—

(उत्तम हमरऽ अंग)

रचनाकार :-

हीरा प्रसाद हरेन्द्र

ग्राम + पो०—कटहरा

मुलतानगंज (भागलपुर)

प्रधानाध्यापक

प्रा० वि० अराजी दोस्तनी

गोराडीह [भागलपुर]

प्रकाशन तिथि :—

स्वाधीनता दिवस २०००

संवाधिकार :—

रचनाकार

मुद्रक :—

राही प्रेस, संतनगर, हनुमान घाट

बरारी [भागलपुर]

प्रकाशक :—

चन्द्र कान्ता प्रकाशन, कटहरा

★ अगला प्रकाशन लेली सहयोग राशि १० [बस] टका ।

दू शब्द

पढ़-लिखे आरु गढ़े वाला प्रवृत्ति हमरऽ सभे दिनां छेलें ।
 कमी-कभार कोय पत्र-पत्रिका म' रचना भेजी से बाज नें ऐयें ।
 'रचना लौटा रहे हैं, आप इसका अन्यत्र उपयोग करले' अहिनों चिट्ठी
 के हमरा कमी नें । रचनात्मक प्रवृत्ति पर त' पल्ला पड़िये जाय,
 तइयो 'काम नया गीत बनाना, गीत बनाके जहाँ को सुनाना, कोई
 न मिले तो अकेले में गाना' हय गनमा के अनुशरण हम्म' खूब
 करियें । फिल्मी तर्जऽ पर गीत बनाय क' कीर्तन-भजन म' गाना
 हमरा बड्डी अच्छा लगें ।

संघऽ द्वारा आयोजित हड़ताल आरु धरना म', नाटकऽ म'
 सभा-सोसाईटी म' कुछ से कुछ गढ़ी क' पढ़ी देना हाय हमरऽ काम
 से लोग खूबे परिचित छेलें । 'चकोर' जी के नाम वर्षऽ से सुनियें ।
 बड़ऽ आदमी के आश करियऽ पास नें जइयऽ, मनेमन गुनियें । देवान
 म' लगें लाक ईटऽ सड़कऽ पर नें रहै छय, हाइयो बात नें भूलियें
 होनी बास्ते सभे दरवाजा खुल्ले रहै छय । एक दिनां गाँम्हें के एक
 ठो अनुरंजन कुमार सिंह नामक युवक दू ठो रचना आरु 'अंग-
 माधुरी' के वार्षिक चन्दा हमरा से मांगी कुन्दन अमिताभ हाथें चकोर
 जी के पास भेजी देलकें । साक्षरता गीत अंगमाधुरी सितम्बर ६७ अंक
 म' छपथें हमरऽ खुशी मनऽ म' समाब नें लागलौ । बादऽ म' ठेरी
 कविता कहानी अंगमाधुरी म' छापी-छापी चकोर जी जे हमरऽ मऽन
 बढ़लकें हाय आभार ध्यक्त करै । खोजलहों शब्द नें पाबै छी ।

अनुरंजन कुमार सिंह रं दोसरऽ गाँम्हें के युवक प्रमोद प्रताप
 सिंह भागलपुरऽ के अंग महोत्सव में 'बगुला' के सम्पादक रामावतार
 राही जी से परिचय कराय जे उपकार करलकें हौब भुललऽ जाय
 वाला नें छय । राही जी के सम्पर्कऽ में एथें आमोद जी, सरल जी,

दिलबर जो, पतझड़ जो रं ढेरों कविगण आपन्हें भेट' सागली।
कवि गोष्ठी कहिनों होय छै, २६ जनवरी ६८ क' पहिलऽ वार सरल
जी के आवासऽ पर देखल मिललौ। हर गोष्ठी म' दोसरऽ-दोसरऽ
कविता सुनाबे के ललक जागली। संकलन बास्तें हाय कविता पुंज
बह' प्रयासऽ के परिणाम छिकै।

'हाय बढ़ियां रास्ता धरनें छऽ' कही-कही ब्रह्मदेव नारायण
'सत्यम' आगू नई म' अच्छे योगदान देने छय। 'बिना कविता
संकलन के कवि की, हरऽ बिना हरवाहा का?' दिलबर जो नें हय
रंग ललकारी, प्रीतम अक्स, डा० राजेन्द्र प्रसाद मोदी आर बाबा
उमानाथ पाठक नें कविता सराही-सराही संकलन निकाले बास्तें
काफी प्रेरित करऽ कं। अंग प्रदेशऽ के नवशा उपराय म' अभिन्न
हृदय उमेश कुमार सिंह काकी परेशान होली, लेहिन अंग जनपद के
बनले ब्लोक ब' क सरल जो परेशानी दूर करी मनऽ जे हर्षसकं हाव
अवर्णय छय।


प्राथमिक शिक्षक होला के नातें विद्यालय परिवेशीय बातऽ क'
समावेश संकलन म' ढेर होल, छै। गाँव-घरऽ से उ' क' देश-विदेशऽ
के बात आर पड़ोसी घुसपंठी के देडी तोड़ी से बाज नें एलऽ छियं।
अंग अत्रीय धरती के धूल फांकी-फांकी भीतर-बाहर आर आगू-पाछू
झांकी-झांकी, बीतलऽ बातऽ क दिल-दिमागऽ म टांकी-टांकी संकलन
तयार करी, डा० इन्दु भूषण मिश्र 'देवेन्दु' जी के कर-कमलऽ म'
समीक्षार्थ धरी हम्म कृतार्थ होम गेलों।

हमरा यहाँ तक पहुँचाबे म' जिनकऽ जत्त सहयोग मिललौ
उनका प्रति ओतने अमार प्रकट करी पहिलऽ प्रयास के पहिलऽ फूल
'उत्तम ह्यरऽ अंग' आगू करी अपना क' हम्म' धन्य-धन्य मानं छी।

जहाँ जे छय

क्रमांक	शीर्षक	पृष्ठ संख्या
१	सरस्वती वन्दना	१
२	माय भगवती	२
३	उत्तंग हमरऽ अंग	३
४	बिहारऽ के महिमा	४
५	गामऽ के खूबी	७
६	किसान देशके जात	८
७	वर्ग पाँच छय शिक्षक एक	९
८	गेहूँ के बितरण अगड़ा के घर	११
९	खूबे पेड़ लगाबऽ	१२
१०	हमरऽ भारत देश महाप	१४
११	ऐले बसन्त	१६
१२	भौरा	२०
१३	भ्रमण	२२
१४	बाबा अजयवी	२४
१५	बच्चा पढ़ाबऽ निरक्षरता भयाबऽ	२५
१६	साक्षरता गीत	२५
१७	आपरेसन विजय	२६
१८	मट्टा पीब फूको-फूकी	२७
१९	उबड़ी म' मूड़ी	२९
२०	बोट	३२
२१	चुनावी माहौल	३३

२२	होनी	३४
२३	साँप छुछुनरी बाला छऽ हाल	३५
२४	वाजीव बात	३७
२५	जों तींय चाहऽ	३८
२६	बुड़बक के घऽन	३९
२७	बेरोजगारी सिटइबें	४०
२८	स्वदेशी सपना	४१
२९	स्वदेशी अपनावऽ	४४
३०	परिवार नियोजन	४५
३१	भावना	४६
३२	अबरी झरियाँ लेल कै जान	४७
३३	भारति गीत/भोला के दुअरिया	४८



समर्पण

परम पूज्य माता-पिता के चरणारविन्दऽ म

जिनी अभाव म जीबी - जीबी,
फाटलऽ भाग्य क सीबी - सीबी,
वाधा से हरदम लड़ी - लड़ी,
गोसांय क पूजी घड़ी - घड़ी,
सुनाय — सुनी सब खरीं खोटी,
दांतऽ के रस घोटी - घोटी,
ध्यान धरी पढ़लक — लिखलक ।
हमरा अहिंनऽ काबिल बनलक ॥

-हरेन्द्र

अभिमत

कवि दू तरह के होय छै । एक जोनें स्वान्तः सुखाय होय क' काल्पनिक आरो दार्शनिक जगत में विचरण करी क' दुनिया क' आपनऽ संदेश दे छै आरो दोसरऽ हुनी जोने बहुजन हिताय आरो बहुजन सुखाय लिखै छै ।

पहलऽ श्रेणी के कवि जहाँ आसमान म' उड़ै छै वहाँ दोसरऽ जमीन से जुड़ै छै । कविवर श्री हीरा प्रसाद 'हरेन्द्र' जी क' दोसरऽ श्रेणी म' राखै छिये । काल्पनिक जगत से दूर रहौ क' वास्तविकता क' आपनऽ पक्ति म' बान्है के हिनका म' अद्भुत क्षमता छै । समाज के विकृति से छटपटेलऽ हिनी जीवन के कोय अंग क' छुवैल नै छोड़ल' छऽत । साक्षरता, बेरोजगारी, परिवार नियोजन नै हिनी देश के गौरव गान के साथे-साथ भोला बाबा क' आपनऽ अरज सुनाय क' नारायण जी के आरति भी उतारै छऽत । यह नै 'अबरो झरियां लेलकै जान' म' हिनी किसान आरो मजदूर के दुख-दर्द बांटै छऽत । बेटी बिहा म' जहाँ दहेज के परेशानी छन वाही वोट, चुनाव आरो घुमखोरी पर भो हिनी करास चोट करल' छऽत । 'हमरऽ भारत देश महान' म' प्राकृतिक सौन्दर्य देखथे बने छै । फूल, तिल्ली, बंदर, भालू, हंस आरो कत' जीव-जन्तु के वर्णन में बड़ी मनोहारी दृश्य उपस्थित करल' छै ।

छन्द में शब्द संयोजन के बड़ा महत्व छै । शब्द सोण्डव भी कविता के प्राण होय छै । जहाँ तरु हुव' कविता म' सरल के साथ कोमल शब्द के प्रयोग से जनमानसे ओकरा लोकी लै छै । रचना त' सोनऽ रग लागै छै, जों सोहापा के प्रयोग हुव' त आकरऽ चमक बढ़ी जाय छै ।

जमीन से जुड़लऽ ऐन्हों प्रकाशन लेला जनकवि श्री हीरा प्र० हरेन्द्र के हम्म' अभ्यर्थना करै छौ आरो आशा करै छौ कि 'उत्तंग हमरऽ अंग' रंग आरो रचना से अंगिका के भंडार भरते रहतात ।

—गुरेश मोहन घोष 'सरल'

महामंत्री,

अखिल भारतीय अंगिका साहित्य कला मंच

परिमिति

— डॉ० तेजनारायण कुशवाहा

काव्य के दू पक्ष होय छै—भाव पक्ष आरो कला पक्ष। पहिलऽ छे कं ऊचऽ-ऊचऽ मानसी भाव आरो विचार, मनन चिंतन, सच्चाय के बर्णन आरो दोसरऽ छेकं ओकरा खोले के ढंग, तरीका। साहित्य के भाषा में ही ढंग या तरीका शैली कहाय छ। हममें यहाँ कवि रत्न हीरा प्रसाद “हरेन्द्र” के उत्तंग हमरऽ अंग के दुन्हू पक्षऽ के मिललऽ जुललऽ रूप पर, समझऽ, एकदम हल्लुक नजर देखी।

‘उत्तंग हमरऽ अंग’ कविवर हरेन्द्र के तैंतीस कविता रों पहिलऽ अंगिका काव्य संग्रह छेकै। शीर्षक ‘उत्तंग हमरऽ अंग’ संग्रह के यह नाम के एक सुन्दर कविता पर देलऽ गेलऽ छै। किताब के शीर्षक से अंग के महिमा—अंग देश के गौरव गरिमा व्यंजित होय छै। ई शीर्षक दू के तीन-चार टा कारण हमरा लौकै छै। एक कारण कवि होरा प्रसाद ‘हरेन्द्र’ के अंग प्रदेश के निवासी-अंग वासी होबऽ हुनका में अंग के माटी लेली अपार श्रद्धा आरो पूजा के भाव छै।

दोसरऽ कारण ‘हरेन्द्र’ के मातृ भाषा माय के बोली अंगिका होबऽ, अमिखं में कविता करबऽ, जे अंगिका (प्राचीन नाम आंगी) अंग प्रदेश के भाव आरो विचार खोलै वाली भाषा छेकै।

तेसरऽ ई संग्रह में यह नाम के एक मुख्य कविता के लगबऽ।

चौथों, ई संग्रह क’ जों देश-वर्णन काव्य मानलऽ जाय त’ यें में ‘उत्तंग हमरऽ अंग’, बिहार के महिमा आरो ह मरऽ देश महान, के अगावा गाँवों के गीत कहबऽ।

कोय रचना के शीर्षक लगावें में जे परम्परा आबी रहलऽ छै, वह परम्परा क’ कविए पालन करत छै।

रचना कुल विषय वैविध्य में आवै छै। यें में अरभ्यंश काव्य रऽ परम्परा में देश-वर्णन के भीतर ‘उत्तंग हमरऽ अंग’ बिहार के महिमा, ‘गाँवों के खूबी’ हमरऽ देश महान आरो भ्रमण गीत आवै छै, जें में कवि के राष्ट्र लेली लगाव आरो भक्ति भाव सतकै छै।

देवी-देवता के भक्ति, सुमिरण, आराधना आरौ पूजा भारतीय अध्यात्म संस्कृति के एक अंग छैकै ।

एक लम्बा परम्परा में माय सरस्वती, भगवती, भोला बाबा, लोक देवता के रूप लेने छे । काव्य कृति के शुरू आत आरौ अंत में मंगलाचरण आरौ भरत वाक्य नाकी फनु बीचों में 'अजगंबी' जेन्हो आध्यात्मिक गीत के योजना यह संस्कृति क दृष्टिबिछे ।

कवि युग के नगीच छे । वर्तमान के सगे-संगे चलबऽ अपना धर्म मानै छे । जेन्हो साक्षरता गोत लिखने छे वह रंग चुनबा माहौल, परिवार नियोजन, बेरोजगारी, पर्यावरण आरनी कविताके संग्रह में स्थान मिललऽ छे ।

'उत्तंग हमरऽ अंग' के कविता प्रगीत काव्य के भीतर मान नऽ जाय पार । वैसे त; ये में भावातिरेक के बहाव के अभाव खटक छे । प्रगीत के देह संगीत आरौ कवि के भावातिरेक या आत्म निवेदन ओकरऽ आत्मा होय छे । गीत में खुशो के फंलाव मिले छे । नीजीपन त रहै छे, बाकिर रागात्मकता रहै छे । गामों के खुशी, माय भगवती, सरस्वती वृन्दना साक्षरता, भावना आरनी गीत उदाहरण लेली लेलऽ जाय पार । सक्षिप्तता के संगे-संग एक अन्विति लागलऽ छे ये सब में । संग्रह के गीत में विविधता छे, बाकिर केन्द्रोप भाव में सब संमान छे ।

गीत के लोक गीत आरौ साहित्यिक गीत ई दू- टा रंगों में उत्तंग हमरऽ अंग के गीत लोक गीत में नञ आवै छे । अंगिका के आपनों लोक गीत के परम्परा से भिन्न साहित्यिक गीत के परम्परा के विरवा २०वीं शताब्दि के पूवा दशक में अखुवेसँ । आब त फून, कोढ़ी आरौ फनो लग लागल । तब, हमम मानै छीं कि अंगिका साहित्यिक गीत अंगिका लोक गीत से फुटलै ।

गौरव होय छे कि 'हरेन्द्र' रं रचना कारे अंगिका साहित्यिक

गीत के पुँज लगाबें में आपनों गीत के पौधा द रहलस छे ।

मॉनसर्गस्कार्ये (Monssorgsky) कहने छै --

“कला अपने आप में साध्य नै मानवता के संदेश रो साधना छेकै—Art is not an end it Self but a Meanse of Addressing Humanity”

कबिरत्न 'हरेन्द्र के 'उत्तंग हमरऽ अंग' के कविता एकरे व्याख्या छेकै । हममें कवि आरो हुनकऽ कृति के स्तुति करै छियै ।

डॉ० तेज नारायण कुशवाहा

राष्ट्रीय अभ्यक्ष

अखिल भारतीय अंगिका साहित्य, कला मंच, भागलपुर

अग कवि 'हरेन्द्र' जी के गढ़लऽ संग्रह 'उत्तंग हमरऽ अंग' देखे के मौका मिलल । हलैकि जेरबंत सिनी होला के कारण चोपाल म' बंठी क हिनकऽ रचना सुनी क खूबे हसलऽ ठठलऽ छियै, लेकिन आय इ बातऽ कखु शियाली छै कि आव' इ अवसरऽ के लाभ ढेरी लाग उठैत । कखनु मदिर-थानों म' बठलऽ रंग लाग छय त कखनु इसकुलऽ के चहार दिवारी म' डुकलऽ रंग बुत्राव छय । कहीं समाजऽ के भीतरलका—लुकैलका बात सुने ल' मिले छय त कहीं राजनितीही के कोख झलकै छै, त स्वास्थी के चचा आरु गामऽ—घरऽ के रीति रिवाजऽ पर प्रहार भी । कुल मिलाप्रक' अंगिका माटी के खानदानऽ के गंध निकल छय ई म' तब त' मट्टा फुँकी—फुँकी, पिय के बात छय । हमरा नजरऽ म' है प्रयास

अंगिका जनपद क हरेन्द्र जी के उपहार छेकै ।

ब्रह्मदेव नारायण सत्यम्

एम० एम-सी०, एम० एड०

प्रतिनियोजित व्याख्याता

रायकीय शिक्षक प्रशिक्षण महाविद्यालय, भागलपुर

हम्म श्री हीरा प्रसाद 'हरेन्द्र' के इ काव्य संकलन 'उत्तंग हमरऽ अंग के अधिकतर रचना क' अलग- अलग पत्र-पत्रिका म' छपलऽ रूपऽ म' आरु खुद कण्ठ स्वर म' श्रव्य रूपऽ म' पढ़-सुन के मिललऽ मौका पर काव्यानन्द म' बारम्बार सराबोर-भावविभोर होय चुकलऽ छी । ऐ क्रमऽ म' आनन्दातिरेक म' अपना मुँहों सँ अतायास निकललऽ ऐन्हों वाह ! वाह ! जेकरा पर पाठक-श्रोता के आपनऽ कोय वश नै रहै छै, मुकवि के रूपऽ म' हीरा बाबू के सामर्थ्य क' रेखांकित करै छै । अद्भुत शब्द संयोजन के साथे साथ विषय बरतु भी राष्ट्रीय, स्वदेशी, सामाजिक, सांस्कृतिक, लौकिक, पीराणिक आदि बहुआयामी संदर्भऽ क' स्पर्श करतें हुव' सटीक प्रासंगिकता के साथ हिनकऽ कवि कर्म के एत' व्यापक फलक सामनें बखै छै कि कोय भी भाव प्रबुद्ध पाठक, श्रोता अंगिका के भावी सिद्धहस्त आरु सामर्थ्य वान कवि के रूपऽ म' हिनकऽ विकास के प्रति आश्वस्त हुव पार । अंगिका के ढेरों कवि क सीधे मुन के मौका हमरा मिललऽ छै । ओकरा सँ ज्यादा कवि के अंगिका रचना क' पढ़ के सौभाग्य मिललऽ छै, लेकिन सरल-सुबोध प्रवाह के साथ भाषा आरु भाव के ऐन्हों मणि-कांचन योग कम्में देख म' ऐजऽ छै ।

हिनकऽ हर रचना म' लोकाभिमुखता के जे धारा सतत प्रवहमान छै, चाहे उ स्वदेशी के प्रश्न पर हुव' या तिलक-दहेज प्रथा, प्रचलित शिक्षा नीति, प्रशासनिक/राजनैतिक भ्रष्टाचार, समाज म' व्याप्त अंध विश्वास, पश्चिमके आक्रामक बाजारवाद हुव या तेजी स फैली रहलऽ अप संस्कृति हुव', आरु प्रखर, सटीक आरु प्रासंगिक होय क उभर आरु पूरा अंग क्षेत्र के आप्लावित करी क' दूर-दूर तक फैला जाय, वह' हमरऽ मंगल कामना आरु दिली स्वाहिश छै ।

गोरे लाल मनीषी

२-११-२०००

पुरोवाक्

—डॉ० इन्दु भूषण मिश्र 'देवेन्दु

एम० ए० (त्रय), पी-एच० डी०, बी०एड्

सत्साहित्य देश आरु काले ली एक बहुत बड़ऽ उपलब्धि होय छै । एकरऽ रचना कोय साधारण बात नञ् एकरा सँ देश-काल आरु पात्र के असलियत के त' पता चलबै करै छै साथे साथ ओकरे मँ ओकरऽ समाधान भी देलऽ रहै छै । ऐसऽ साहित्य सभ्भे कवि—सात्यिकार नञ् लिख' पार । इ लेली कि ओकरो पाछू रचनाकारऽ के आपनऽ एक बहुत बड़ऽ साधना छिपलऽ रहै छै । रचनाकार परिवेश आरु संस्कार सँ विषय क' आत्मसात् करी क' ओकरा संस्कारित करै छै आरु फिह समाज के मासने परोसै छै ।

आय हम्म' सनी जे संस्कृति मँ पजी रहल छियै आरु जे संस्कृति आय के समाज म' पनयो रहलऽ छै, इ केकरो सँ छिपलऽ नञ् । इ ले ली आय के अपसांस्कृतिक माहौल मँ जे रचनाकार सत्साहित्य रचै म' लागलऽ छऽथ उ सभ्भे हमरा दृष्टि सँ, वन्दनीय आरु स्मरणीय छऽथ ।

सत्साहित्य लेखन म' अंग जनपद के भी आपनऽ स्थान छै । एकरा म' तनियो टा सन्देह नञ् कि अंग जनपदीय रचनाकार के एक बहुत बड़ऽ हिस्सा अभियो तांय प्रचार-प्रसार सँ आपना क दूर रखल' छऽथ, मतर इ ठीक नञ् । हमरा सनी के भी दायित्व बने छै कि हुनका आय प्रचार—प्रसार म' लावियै । हुनका जनता-जनार्दन आरु पाठक वर्ग सँ जोड़ियै ।

हमरा आय जहाँ ताय याद आवँ छै कि अंगिका साहित्य के रंगमंच कला से हमरऽ रचनाकार भाय सिनी इ-दिशा में चेतलऽ छऽथ आरू अब' हुन्नीं सम्भे जनता-जनार्जन आरू पाठक वर्ग से भी आपना क' जोड़लकऽ छऽथ ।

कवि श्री हीरा प्रसाद 'हरेन्द्र' एक ऐन्हें सत्साहित्य-कार छऽथ जे अंगिका भाषा—साहित्य क' जन—जन तक पहुँचावँ ली, एकरऽ सत्साहित्य से सबक' अवगत करावँ ली कमर कसन' छऽथ ।

हिनकऽ काव्य-साहित्य के विषय कोय परी कथा नञा, बिल्कुल हमरा तोरा बीच के छै । गाँव—समाजऽ म जे आय देखय छियँ बस वह' । इ ले ली हिनकऽ रचना-साहित्य कोय फूहड़ प्रयास नञा मानतऽ जाय पार' । हिनकऽ रचना-साहित्य आपनऽ पाठक ली एक सत्परिवेश क गढं छै जेकरा से समाज के हर वर्ग आय अपना ले ली कुछ नञा कुछ अवश्य पावय छै

कवि हीरा प्रसाद 'हरेन्द्र' जी पेशा से शिक्षक छऽथ । इ ले ली हिनकऽ हरेक रचना शिक्षाप्रद होय छै । बाल-ब्रुतरु काल्ह कऽ भविष्य छै । इ ले ली हिन्हीं ओकरा कुच्छू अवश्ये समाज-देश आरू मानवता के रक्षा ले ली सिखावँ, पढ़ावँ चाहै छऽथ । इ प्रयास श्लाघनीय छै ।

हिनकऽ इ काव्य-संग्रह में जे भी रचना छै सबके सब साफ-सुथरऽ आरू सत्साहित्य के रूपऽ में देखलऽ जाय पार' । एना त' साहित्य के अरथे होय छै सबके हित ले ली रचलऽ

रचना-संसार । मतर 'सत्' शब्द के जोग सँ एकरऽ रूप आरु बढ़ी जाय छै । हमरा दृष्टि सँ त' 'सत्' वह' रचना होवै पार' जे 'शिव' आरु 'सुन्दर' छै । 'शिव' के अर्थ यहां 'कल्याण' आरु 'सुन्दर' के अर्थ मन क' हरै वाला ले लऽ जाय पार' ।

भाय 'हरेन्द्र जी के रचना म' व्यंग्य अ'दि जे भो काव्य घटक - तत्त्व छै सभ्भे 'सत्यम् शिवम् सुन्दरम्' के प्रकाशऽ सं दूध नाँखी साफ-उज्जरऽ झकमक करी रहलऽ छै ।

पुस्तक के प्रारम्भ 'सरस्वती वन्दना' सँ होय छै आरु अन्त भाला बाबा के गीतऽ स' । कहै के मतलब कि काव्य आध्यात्मिक-चेतना सम्पन्न कवि छऽथ । जे आय ले ली बड्डी कठिन संस्कार छै । हिन्हीं आपनऽ हर रचना के द्वारा जे सत्य क' राखैके कोशिश करलकऽ छऽथ उ हमरा सब बुद्धिजीवी क' कहीं नञा कही सँ सोंचे ली अवश्ये मजबूर करै छै ।

दुनिया के गुरु कहलावै वाला आय खुद्दे भारतवासी कहाँ जाय रहलऽ छै ई कवि दृष्टि म' चिन्तनीय छै । कवि यही संग्रह म' एक जगघऽ लिखनै छै—

अनीति, अन्याय आरु आसुरी माया,
हेकरऽ मकड़जाल देखि कल्पै छै काया,
मोह-पाश काटे वाला, शक्ति के वरदान द' ।

सच्चे, आय चारहूँ तरफ अनीति, अन्याय, आरु आसुरी प्रवृत्ति के मकड़जाल विछलऽ छै । कोय बचावै वाला नञा । सबके सब एकरऽ दास बनी गेलऽ छै । आखिर ऐकरा जब ताँय हम्म' सनी दूर नञा करव तब ताँब भला केना क' भारत खुशहाल होतय ।

हीरा प्रसाद 'हरेन्द्र' जो आय के व्यवस्था, शिक्षा,

संस्कार, राष्ट्रशक्ति सब सँ दुखी छै । कहियो कोय गाँधी के
अदर्श आरू मर्यादा के रक्षा करै वाला नञ्ज । हिनकऽ
स्वदेशी सपना आय चकनाचूर होय रहलऽ छै । अंग्रेजियन
आय सभ्भे पर हावी छै । कवि उक्ति म' कुछु बानगी आपने
सनी भी देखिए—

वापू जी के स्वदेशी सपना, भैजे चकनाचूर
विदेशी के चंगुल में तड़पे, सब किशान-मजदूर ।

★ ★ ★
हाय इहै छेलै वापू के खाव ।

लूट पाट करी बनें नबाव ॥

या फिर—

आय सत्य-अहिंसा, धरम छोड़ि क' मिथ्या क' अपनै लै
बड़का-बड़का के लोक-लाज हम, सभ्भे टा बिसरैलां,
बिन मतलब वाला झूठ बात म' झूठे कसमो खैलां,
झगड़ा-झंझट आरू निन्दा म' वेशो समय गमैलां ।
निस्सन्देह, अ यके 'युगसत्य' हमरा सत्र क इ सोचय
ली मजदूर करी रहलऽ छै कि आखिर हममें आय जाँव त जाँव
कहाँ ?

एक मत्साहित्यकार के हैतियत सँ कवि एकरऽ यथा-
संभव जवाब भी दैय के कोशिश करै छथ । कवि वाणी छै-
सोचो भैया अभियो सब्भै/विदेशी क ठुकराबऽ ।
घर के काम, खानदानी पेशा/अपन, सब अपनाबऽ ।
बढ़िया-घटिया जहिनों भी छै/स्वदेशी हमरऽ शान ।
स्वावलम्बी होलहैं स आपन-/भारत देश महान ।
सच, जब ताय हमरा सनी के ऊपर सँ विदेशा पन
दूर नञ्ज होतय, आरू हममें सभ्भे अपनऽ खानदानी पेशा क'

भरपूर श्रद्धा, निष्ठा आरु विसवास के साथे नञ्ज अपनैबय तब तीय हमरा सती के कल्याण नञ्ज । देखा-देखी से हमरऽ कल्याण नञ्ज होव' पार' । स्वावलंबन के पाठ पढ़े वाला ही देश क' महान् राखे पार' ।

'स्वदेशी ग्रहण' हमरऽ आय के लाचारी नञ्ज, जरूरत छै । बिना एकरऽ आय हमरऽ समाज में शान्ति नञ्ज आव' पार' । कवि इ सन्दर्भ म' सभ्भे क' बिल्कुल साफ-सुथरा सलाह दे छै कि—
स्वदेशी अपनाबऽ हो भैया, स्वदेशी अपनाबऽ ।
देश के दुश्मन सदा विदेशी ओकरा सब ठुकराबऽ ॥
धन्य छै आपनऽ देश के माँटो आरु गंगा-गानी ।
जेकरऽ सेवन से भाग छै, देहऽ के परेशानी ॥

कवि क' आपनऽ देश आरु स्वदेशी निष्ठा व्यवस्था पर गरब छै । कारण यहाँ कहीं भी बनाबटीपन नञ्ज छै । दोहरापन नञ्ज छै ।

कवि 'हरेन्द्र' जी एक शिक्षक होवय के नाते आपनऽ शिक्षकीय संस्कार के सुरभि भी बिखेरि म कोय कोर-कसर नञ्ज छोड़ै छऽथ । हिनकऽ रचना से बड़का से लेक' छोटका, बच्चा—बुनरु तीय लाभ उठाव' पार' ।

कवि 'हरेन्द्र' जी बिहारऽ महिमा के द्वारा बिहार के सम्बन्ध में बड़ी सहजता के साथ बच्चा-बुनरु क' जानकारी दे छऽथ। एकरा याद करै म' बच्चा सती क कोइयो दिक्कत नञ्ज । हिनकऽ कुच्छु पक्ति क देखियै —

हमरऽ राज्य नग बड़ी सुन्दर/महिमा अगम अगार ।
जेकरा बीच—बाव बहे छै गंगा जी के धार ॥
दक्षिण दिशा छौन उड़ीसऽ स्थित उत्तर में नेपाल ।
पश्चिम में यू०पी० एम० पी० आरु पूरब में बंगाल ॥

कोडरमा केरऽ अबरख, तागबा घाट शिला बेजान ।
 मूरी में एलुमिनियम, झरिया में कोयला के खान ॥
 जमशेदपुर के लोहा नामी, घर—घर छै परचार,
 हमरऽ राज्य लागे बड़ी सुन्दर, महिमा अगम अपार ।
 गामऽ के खूबी, खूबे पेड़ लगावऽ किसान देश के जान, हमरऽ
 भारत देश महान, बच्चा पढ़ावऽ निरक्षरता भगावऽ, वाजिव बात
 भ्रमण आदि कुल मिलाय जुलाय क' हिनकऽ हरेक रचना उत्तम
 शिक्षकीय संस्कारयुक्त आरु शिक्षाप्रद छ ।

अब हिनकऽ कुच्छ सुधारवादी रचना क' भी देखलऽ जाय ।
 कवि 'हरेन्द्र' जी एकरा द्वारा समाज में परिवर्तन-चाहें छऽथ ।
 कुच्छ बानगी देखिए—

वर्ग पाँच छै शिक्षक एक ।
 हे बिहार सरकार लगावऽ
 शिक्षों में कुछ बुद्धि-विवेक ।
 नामांकन त हममें खूब करे छी,
 बच्चा बोलाव' घर घर घुरै छी,
 गाँव स' बच्चा आवै छै ढेरी,
 अकेल्ले सब क' राखे छी धेरी,
 बकरा—बोतू हम्हीं गिनै छी
 जनगणना में माथा धुनै छी
 हमरा ऊपर बोझ अनेक
 वर्ग पाँच छय शिक्षक एक ।
 सबके हाजरी डरे बनाय छी,
 सबके खातिर गेहू मगाय छी,

आफिसरें बोरा विन तोलले देखों
 मास्टरें नब्बे के क्विंटल लेथों
 गामों म' शिक्षा समिति बनाय छी,
 समिति क' साथ प' चढ़ले पाय छी ।

विद्यालय कहियो महीना खाँड़े, घूमलऽ फिरलऽ जाय छी,
 गामों के लोग कुच्छु बोली छय हम्में त' गम खाय छी ।
 छोटका मोटका आफिसर सब क थोड़े जी लगाय छी,
 बड़का बड़का के पारी ऐन्हों दै लै क' फड़ियाय छी ।
 साथो सगत सब्भे समझैथों, पड़भ' तोंय फेरा म'
 जहिया ऐभ' कोय ऊपरवाला अफिसरऽ के घेरा म'
 देखलऽ जत' विद्यालय म' रोजे सोंसे दिन कत्त सड़बऽ
 उखड़ी में मूड़ी देने छी हम्म' चोटऽ से कत्त डरबऽ ।

उपर्युक्त तीनों कविता में कवि जे युगसत्य क' उगलकऽ छै
 ओकरा आय कोय नञा नकारें पार' । इ आय शिक्षा आरु शिक्षा
 जगत् के रोढ़ शिक्षक आरु अधिकारी के मनोदशा क' साफ-साफ
 चित्र खीचै छै । आय के शिक्षा के रखवारा शिक्षक आरु अधिकारी
 सनी के ऐसनऽ हालत रहतै त' शिक्षा के की दशा होतय । ऐकरा
 कोइयो समझै बुझै पार' । एकरा में आमूल सुधार चाहे छऽथ । उ
 शिक्षक, शिक्षा आरु शिक्षा अधिकारी सब्भे के दशा आरु दिशा में
 सुधार के कामना करै छऽथ ताकि देश के भविष्य सुरक्षित रहै पार' ।

एतने नञा । नेता सनी क' भी खबर रखै छऽथ । नेता देश
 में विधान बनौवै छै । युग दिशा ली निर्धारक के भूमिका निभाभै
 छै । मतर जब देशऽ क नेतै दिक् भ्रमित होय जैतै त' देश क' डूबन'
 लिख छऽथ —

जीती क' जंथों घुरी नैऐथों,
 षटन्हें, दिल्ली में दिवस गमैथो,
 इठलैले चलथों टेढका चाल,
 प्यादा से फरजी वाला छौं हास ।

सम्भे नेता म'एवके बीमारी
 आपनहै म'करथों मारामारी
 पाटिये रोज बदलथों खाली
 हरदम खोजथों दूध के छाली ।
 करथों की बें देश के सेवा
 खोजें छों जीने माखन मेवा ।

कवि 'हरेन्द्र' जी के उपर्युक्त पंक्ति जे दुख—भरलऽ छे, जे लाचारी भरलऽ छे ओकरा कोइयो बुद्धिजीवी नञा नकारें पार' । आरु हुनका ली आपनऽ आय के नेता के स्वरूप अपरिचित नञा रहै पार' ।

अयोग्य व्यक्ति क' नेता पद मिलना प्रजातंत्र के सबसे बड़ऽ दुःख छे । कर्तव्यहीनता आरु ओकरऽ भोगवती दृष्टि राष्ट्रीय अस्मिता, रक्षा, एकता आरु अखण्डता पर आय एक प्रश्नचिह्न छोड़ी देलकऽ छे ।

कवि 'हरेन्द्र' जी के धारदार व्यंग्य दृष्टि नेता, दहेज शिक्षा, शिक्षक, छात्र एवं समाज सम्भे पर समान रूप सँ पड़लऽ छ । कवि हिनकऽ दशा-दिशा सँ, बिना कोय लाग लपेट के जन सामान्य क परिचित करावे के भरपूर चेष्टा करलकऽ छथ ।

'उत्तंग हमरऽ अंग' कविता—संग्रह के शीर्षक छे । जेकरा माध्यम सँ कवि अंगस्तुति प्रस्तुत करि क' अंग माहात्म्य सँ जन-जन क' परिचित करावे छथ ।

संग्रह के रचना में भाषा के सहज-सरल प्रयोग भाव प्रस्तुतिकरण में चार चाँद लगने छे । साथे साथ जग्धी-जग्धऽ पर निद्रु देहाती शब्दऽ के प्रयाग रचना क बहुत जानदार बनाय-देलकऽ छे ।

कुले मिलाय क' कवि 'हरेन्द्र' जी के इ इन्द्रधनुषी भाव धारा सँ भरलऽ पृरऽऽ काव्य यात्रा आशंसनीय छे । हमरऽ हिनका ढेर सनी शुभकामना ।

इन्दु भूषण मिश्र 'देवेन्दु'

महासचिव, भागलपुर प्रमडलीय

आखल भारतीय भाषासाहित्य सम्मेलन



सरस्वती वन्दना

सरस्वती मैया हे !
महिमा तोर अगम अपार ।

ब्राह्मी, वागीश्वरी, महाश्वेता वाणी,
वागीशा, विधात्री, शारदे वीणा-पाणि ।
नाम अनेक छौंन तोहार ॥

शुक्ल पक्ष पंचमी, माघऽ रंग महीना,
मैया के हाथ शोभै, पुस्तक आरु वीणा ।
काव्य, संगीतऽ के आगार ॥

नीर-क्षीर विवेकी हंस छेखौंन बाहन,
श्वेत कमल पे शोभे मैया तोरऽ आसन ।
श्वेत सच्चाई के आसार ॥

कालिदास, वाल्मीकि, तुलसी आरु कबीर
पुराण-प्रणेता व्यास, भवभूति, भास, सूर,
विज्ञान पे तोरऽ आभार ॥

मुझ दुखिया के मैया ! लीहो अब खबरिया,
मनों म' अज्ञानऽ के भरल छय अन्हरिया ।
मेटिहो अज्ञानऽ के अन्हार ॥

★ 'अंग माधुरी' जनवरी-फरवरी ६६ अंक में प्रकाशित



माय भगवती

हे माय भगवती हमरा
 भक्ति के वरदान द' !
 अनीति अन्याय आरू
 आमुरी माया,
 हेकरऽ मकड़ जाल देखि,
 कल्पे छय काय ।
 मोह-पाश काट वाला
 शक्ति के वरदान द' ।
 अस्त्र-शस्त्र धारी मैया,
 सिंह के सवारी ।
 सबक' त्राण देह',
 महिषासुर मारी ।
 शरण पड़ल छी मैया,
 हमरा ऊपर ध्यान द' ।
 बायाँ सरस्वती शोभों,
 लक्ष्मी तोरऽ दहिना ।
 जगत के कल्याण करऽ
 मिली तीनों बहिना ।
 हरदम गुण-गान करों,
 बौहिन जुवान द' ।
 हे माय भगवती हमरा भक्ति के वरदान द' ॥

उत्तंग हमरऽ 'अंग'

हमरऽ अंग उत्तंग धरा पर,
 अथबं वेद म' हेकरऽ गान ।
 ऐतरेय, गौपथ ब्राह्मण भी,
 अंग-बंग से नैं अनजान ॥

चित्ररथ राजा अंग वंश के,
 रोम पाद जे कहलाबै ।
 चम्प नाम ओकरे परपोता,
 ई चम्पा नगर बसाबै ॥

हाबह' चम्पके खानदानऽ म'
 जन्मे अधिरथ नामक सूत ।
 जे पैलक गंगा म' पिटारी,
 बोंय म' सूतलऽ कृष्ण-सपूत ॥

कर्ण करै सावा मन सोना,
 आपनऽ हाथें रोजे दान ।
 दानवीर हाब अंगराज के
 करै छिये हम्म' गुण-गान ॥

शुभद्रांगी यही चम्पाके,
 सम्राट अशोक के माय ।
 लखीन्दर केरऽ पत्नी बिहुला,
 इन्द्रःसन देलक हिलाय ॥



चम्पक श्रेष्ठी कथा कहै छय,
 चम्पापुरी पुरानऽ नाम ।
 महाँ करै छय बढ़िया बनकर,
 अभियो नित करघा के काम ।

बिक्रमशिला आचार्य पहिलकऽ
 हमरऽ अंग भूमि के नूर ।
 अतिश दीपंकर ‘श्रीज्ञान’ जी,
 जे होलै जग में मशहूर ॥

गंगा बीच बटेश्वर शोभै,
 शोभै श्री अजगैवी नाथ ।
 लाखों यात्री सालहैं आवी,
 दर्शन करी टेकै माथ ॥

धनकुण्ड आरू बाबा विष्णु,
 धनू महतो केरऽ थान ।
 मंदार-मथानी केरऽ महिमा,
 हाय त’ गावँ वेद-पुराण ॥

गोनू बाबा के महिमा कहौ,
 हमरऽ मनमां कहाँ अघाय ।
 साँप कटलका शरण में आबी,
 लौटी हँसी-खुशी सें जाय ॥



बिहारऽ के महिमा

हमरऽ राज्य लागै बड़ी सुन्दर
महिमा अगम अपार ।

जेकरा बीचे-बीच बहै छय,
गंगा जी के धार ॥

दक्षिण दिशा छौंन उड़ीसा स्थित,
उत्तर में नेपाल ।

पश्चिम में यू०पी०, एम०पी आरु
पूरब में बंगाल ॥

चारो तरफ सँ घेरलऽ लागै
सौंसे राज्य बिहार ।

जेकरा बीचे-बीच बहै छय
गंगा जी के धार ॥

कोडरमा केरऽ अबरख, ताम्बा
घाटशिला के जान ।

मूरी में एलुमिनियम, झरिमा
में कोयला के खान ॥

जमशेदपुर के लोहा-नामी
घर—घर छय परचार ।

जेकरा बीचे—बीच बहै छय,
गंगा जी के धार ॥

[६]

घाघरा, बूढ़ी गंडक, कोशी,
 फाल्गू, पुन—पुन, सौंन ।
 सब्भे नद्दी जीवन दैछौंन,
 सब्भे दैछौंन धौंन ॥

सब्भे दैछौंन रंग--विरंगी
 फसल केरऽ उपहार ।
 जेकरा बीचे--बीच बहै छय
 गंगा जी के धार ॥

महावीर के पुण्य भूमि यहीं
 गौतम के अवतार ।
 मंडन मिश्र के प्रकाण्डता सें
 परिचित सब संसार ॥

पिजेरे में सुग्गा—सुग्गी जहाँ
 करै वेद उच्चार ।
 जेकरा बीचे--बीच बहै छय
 गंगा जी के धार ॥

सीता जनम बिहार में पैलक,
 रघुपति पैलक ज्ञान ।
 धनुष यज्ञ मेला में जनकपुर
 मुनि संग करै पयान ॥

धनुषा तोड़ी जानकी ब्याहै, करे लोग जयकार ।
 जेकरा बीचे--बीच बहै छय गंगा जी के धार ॥

अंग माधुरी सितम्बर १८ अंक में प्रकाशित

गामऽ के खूबी

एक छोटऽ टा गीत हम गाय छी ।
 आपनऽ गामऽ के खूबी सुनाय छी ॥
 हमरा गामऽ के नाम छौंन कटहरा ।
 बड़का टा गाँव आरू छौं वड़ा हरा-भरा ।
 लेकिन बिजली ल' सब्भे लनाय छी ॥ आपनऽ ॥
 पक्की सड़क हमरा गाँव के बीच-बीच ।
 बच्चा में हाय स्कूल, पढ़ै सब ऊँच-नीच ।
 पुस्तकालय सब मिली क' चलाय छी ॥ आपनऽ ॥
 यहाँ बस नौआ, धोबी, ब्रह्मण, चमार छय ।
 राजपूत, यादव आरू कुर्मी-कमार छय ॥
 यहाँ हाड़ी, दुसाद सब पाय छी ॥ आपनऽ ॥
 थोड़ऽ सा पंडित, तांतो, दु तीन रंग के सावछय ।
 यहाँ सब्भे जाति के बड़लऽ खूब भाव छय ॥
 हमम' रहै मिली-जूली सब्भे भाय छी ॥ आपनऽ ॥
 मील आरू मेडिकल, भरलऽ दुकाग छौंन ।
 गामऽ म' मिलै सब जरूरत के सामान छौंन ॥
 देव दर्शन देव लोकऽ म' पाय छी ॥ आपनऽ ॥
 इन्जीनीयर, डाक्टर, वकील अंचलाधिकारी,
 एक्टर, डायरेक्टर व विद्या के पुजारी ॥
 नाटक क्लबऽ म' धूम मचाय छी ।
 आपनऽ गामऽ के खूबी सुनाय छी ॥

किसान देश के जान

देश के जान भैया किसान ।

देहऽ म' जैसे बसै छय प्राण ।

तोरा बल पर बाबू भैया,

चलै छय सब्भे सीना तान ॥

देश केरऽ वक्ता, अधिवक्ता,

डाक्टर छौं चाहे अभियंता,

सरस्वती, लक्ष्मी के पुजारी,

आरो बड़का-बड़का नेता ।

सबभे क' तोरऽ एक भरोसा ।

सबके आशा हरऽ के नाशा ।

महा भाग छऽ अन्न के दाता,

तइयो तोरा पास निराशा ॥

बगैर अन्न सब वीर-जवान,

कैसें राखतै देश के शान ।

संशय आरु निराशा त्यागऽ

तोरऽ काम छौं बड़ा महान ॥

देश तोरा ऊपर खुश हाल ॥

वरणा होतै हाल बेहाल ।

तोरा जागनें जागतै देश,

तोरऽ मेहनत के यह' कमाल ॥

अंग माधुरी मई ६६ अंक में प्रकाशित ।

वर्ग पाँच छय शिक्षक एक

वर्ग पाँच छय शिक्षक एक ।
 हे बिहार सरकार लगाबऽ
 शिक्षौ में कुछ बुद्धि-विवेक ।
 वर्ग पाँच छय शिक्षक एक ॥

केना क' बढ़तै प्राथमिक शिक्षा
 एकखै कमरा म' पच—पच कक्षा
 आपनों घर द्वार क' स्वर्ग बनाबऽ
 मौका छौन बढ़िया लाभ उठाबऽ
 बिद्यालय के छौन जर्जर हाल ।
 तोरऽ शासन काल के यह' कमाल ॥
 नामांकन त' हम्म' खूब करै छी ।
 बच्चा बोलाब' घर—घरै घुरै छी ॥
 गाँव सँ बच्चा आवै छय ढेरी ।
 अकेल्ले सबक' राखै छी थेरी ॥
 तोरऽ व्यवस्था त' एहिनों तगड़ा,
 बच्चा बंठैल' करै छय झगड़ा ।
 पढ़ैल' जग्घऽ नै पीयैल' पानी ।
 प्राथमिक स्कूलऽ के अजब कहानी ॥

मिलथी नै एक्को अमिलेख ।
 वर्ग पाँच छय शिक्षक एक ॥

देखै छौंन सबभै व्यवस्था तोरऽ
 नै सपरै छौंन त' गद्दीये छोड़ऽ
 बिना मतलब वाला काम करै छऽ
 शिक्षा म' सुधारऽ के दम्भ भरै छऽ
 ग्राम पंचायत हमरा प' बोझलह'
 हमरा सताबै के युक्ति खोजलह'
 आब' हम्मीं सब बच्चा कि पढ़ैबऽ
 मुखिया के सेवा म' हरपल बितैबऽ
 बिगड़ी जाय भले गामों के बच्चा,
 वह' करऽ तोरा लाघोंन जे अच्छा ।
 हम्हीं करै छी स्वास्थ्य परीक्षण ।
 चुनाव कराय के लै छी शिक्षण ॥
 बकरीं बोतू हम्हीं गिनै छीं ।
 जन गणना म' माथा धुनै छी ॥
 हमरा ऊपर बोझ अनेक ।
 वर्ग पाँच छय शिक्षक एक ॥

आंगीं प्रभा सितम्बर-दिसम्बर ६६
 अंक में प्रकाशित ।

शिक्षा छोड़ी दोसरऽ काम, माथा सें दूर भगाबऽ ।
 आपनऽ मुन्ना के भविष्य ल', जनता भी जोर लगाबऽ ॥

गेहूँ के वितरण झगड़ा के घर

गेहूँ के वितरण झगड़ा के घर ।
कौनों गरिबैत लाग छय डर ॥

जे बकरी चरयों, पढ़' नैं जंथों,
ओकरऽ गार्जन बोलैल' ऐथों !
मास्टरें की दै छय अपनां घरऽ सें ।
मास्टरो चुप छौन लाठी डरऽ सें ॥

सबके हजारी डरें बनाय छी ।
सबके खातिर गेहूँ मंगाय छी ।
औफसरें बोरा बिन तौलले देखों ।
मास्टरें नब्बे के क्विंटल लेथों ॥

गामों म' शिक्षा समिति बनाय छी ।
समिति क' माथा प' चढ़ले पाय छी ॥
अफसर त' महिना—खांडें जैथों ।
समिति के लोगें रोजे धमकैथों ॥

एक मुट्ठी गेहूँ कम नैं दिहो ।
गेहूँ के बदला पैसा नैं लिहो ॥
नैं त' तोंय घोटाला म' जंभेय ।
फेरऽ म' पड़ी पीछू पचतैभेय ॥

हम्में बोला सभिस बवाय म' ।
ग्रामीण लागलऽ घोंस जमाय म' ॥
हमरा त' पेटऽ में बहै छौन हऽर ।
गेहूँ के वितरण झगड़ा के घर ॥

खूब पेड़ लगावऽ

पयविरण शुद्ध बनाबैल'

खूब पेड़ लगावऽ भैया ।

हाय जीवन सुफल बनाबैल'

खूब पेड़ लगावऽ भैया ॥

धरती पर ऊपज कराबैल'

पेड़ वर्षा खूब कराबै ।

टहनी— डाली झूमी— झूमी,

बादल क' पास बोलाबै ॥

मिट्टी केरऽ कटाव क' रोकी,

भू क्षरण से यही वचैथी ।

पेड़-पौधा अगर नै होथीं,

प्रदूषण त' धूम मचैथीं ॥

अगर नै होथीं गाछ वृक्ष त'

धरती तबो क' होथीं आग ॥

वर्षा पिघलथीं, पानी बनथीं,

डूबथीं भूमि के सब भाग ।

धरती लेथीं जल समाधि तब,

कैसे रहत हेत' लोग ।

हाय समझा मिली-जूली,

छी बिचार करे के जोग ॥

धार्मिक ग्रंथऽ म' पेड़ लगाना,

बडा पुण्य बनलाबै छय ।

पेड़ कऽना बड़ा पाप छय,

योही टा समझाबै छय ॥

बेटा रंग पेड़ें लोगऽ के
 खूबे यश फेलाबै छय ।
 बेमतलब पेड़ काटे वाला,
 नरक जाय पछताबै छय ॥
 तुलसी, केला व पीपल, बेल,
 इ पौधा पूजै के योग ।
 हमरा सब माथा सँ भागै,
 एकरऽ सेवन सँ दुख--रोग ॥
 बापें—दादा पेड़ लगौलक,
 जे फल हम्म' भोगे छी ।
 यही साथे पूर्वज- पितरऽ के,
 नामों हम्में जोगे छी ॥
 अगला पीढ़ी ले' हम्मूँ तोंय,
 कुछ पेड़ लगाभो भैया ।
 पेड़ लगाय के सब लोगऽ म'
 सद्भाव जगाभो भैया ॥
 बच्चा के जनम—जनीवा म'
 या बीहा—शादी के दिन ।
 पेड़ लगाबं के हाय रोहतऽ
 सबक' हौथों वड़ा पसीन ॥
 ऐहिनों-- ऐहिनों मौका पर,
 पेड़ लगायके ठान्हों बात ।
 मौसम चाहे कहिनों रहै,
 जाड़ा कि गर्मों, बरसात ॥

त्रालन्दा दर्पण मार्च २००० में प्रकाशित ।

हमरऽ भारत देश महान

जग में ज्ञान किरण छिटकावै,
 सगरे जेकरऽ मान—सम्मान ।
 सब्भैं जानै, सब्भैं मानै,
 हमरऽ भारत देश महान ॥
 सिर पर मुकुट हिमायल शोभै,
 नीचें जलधि पखार' पाँव ।
 हाय बीचऽ में अस्ती फिसदी,
 बसलऽ झलकै खाली गाँव ॥
 गामों के देख सदा सें भारत,
 बीचे गंगा घहरावैं ।
 तीन तरफ सें तीन समुन्दर,
 एकरा घेरी लहरावैं ॥
 ब्रह्मपुत्र, कृष्णा काबेरी,
 जमुना, सिंधु, कोसी, सोन ॥
 सरस्वती चाहें वागमती,
 कम लागैं केकरा सें कोन ।
 स्वर्ण रेखा क' के नैं जानै,
 जे कर' कहियो सोना दान ॥
 सब्भैं जानै, सब्भैं मानै,
 हमरऽ भारत देश महान ॥

दुनिया म' खोजो नै मिलथौ
 विविध भाषा सँ भरलऽ देश
 आबऽ घूमी हाय राज्य क' देखऽ
 सब भाषी के अलगे भेष ॥
 केरल, तामिलनाड, उड़ीसा,
 मिजोरम, बिहार, बंगाल ।
 हरियाना, पंजाब, मेघालय,
 गोवा, कश्मीर, भीपाल ॥
 उत्तर प्रदेश, आसाम, त्रिपुरा,
 गुजरात, आंध्र, अहणचल ।
 महाराष्ट्र, कर्नाटक, सिक्किम,
 छुटल्हों मणिपुर, हिमाचल ॥
 नागालैण्ड के बाद वचँछय,
 खाली एक्के राज्यस्थान ।
 सब्भें जानै, सब्भें मानै,
 हमरऽ भारत देश महान ॥
 हमरऽ भारत भू पर झलकै,
 कहीं जंगल, कहीं पहाड़ ।
 कहीं बाघ, मृग, भालू, चिता,
 ओयझें मुनऽ सिंह दहाड़ ॥
 देखैल' कन्हौं-कन्हौं मिलथौं,
 करिया बंदर, उजला मोर ।
 कीवा, मैना, बगुवा, बगरो,
 पपिहा कहीं मच्चाब' शोर ॥

हंस, कबूतर, चील बाज छय,
 सुग्गा केरऽ टेढ़का लोल ।
 आमी गाछी प' सालहैं सुनभ'
 कोयल के बोली, अनमोल ॥
 रंग—विरंगा तितली, भौरा,
 फूलही के भरलऽ मुस्कान ।
 सब्भैं जानैं, सब्भैं मानैं,
 हमरऽ भारत देश महान ॥
 रामेश्वरम्, अयोध्या, काशी,
 ऋषिकेश, बद्रीका धाम ।
 गुरुवापुर, मथुरा, वृन्दावन,
 खूबे घूमऽ तीरथ तमाम ॥
 कुमारी कन्या पार्वती छय,
 पुरी सें घुरी—फिरी आबऽ
 तिरुपति वाला वाला जी क'
 नारियले फोड़ी चढ़ाबऽ
 मधुसूदन, मंदार मथानी,
 बैष्णो देवी, चण्डी माय ।
 मुलेतानगंज म' अजगैबी,
 बाबा बसलऽ देवघर जाय ॥
 साहेबगंज के नजदीक म' छय,
 रेबसी माय के थान ।
 सब्भैं जानैं सब्भैं मानैं,
 हमरऽ भारत देश महान ॥

सब्भे रंग के वेशो भाषा,
 सब्भे रं देश के मांटी ।
 कहीं प' चिकनी, कहीं प' दोमट,
 कन्हौं देखऽ बलकस खांटी ॥
 वसन्त, गर्मो आरु वर्षा,
 शरद ऋतु जब आवैं छौंन ।
 हेमन्त, शिशिर झांकी पीछू,
 मन्ने—मन लजावैं छौंन ॥
 धर्म निरपेक्ष हमारा देशऽ म',
 सब धर्म के रहै छय लोग ।
 सबके सब एक दोसरा क'
 करै छय खूबे सहयोग ॥
 होली कोय मनावै इस्टर,
 सोहराय कोय रमजान ।
 सब्भें जानै, सब्भें मानै,
 हमरऽ भारत देश महान ॥
 सम्यता—संस्कृत के सूरज,
 पहिनें उगलै हमरऽ देश ।
 हमरा देशें फलैनें छय,
 विश्व—बंधुता के संदेश ॥
 राम-कृष्ण के हाय धरतीं पर,
 गौतम, गाँधी के अवतार ।
 मंडन मिश्र के सुग्गा—सुग्गी,
 हरदम करै वेद उच्चार ॥

पुराण अठारह वेद व्वास के
 सबभ क' खूबे भावै ।
 वेद, शास्त्र, रामायण, गीता,
 हाय धर्म ग्रंथ कहावै ॥
 महाभारत के कथा-कहानी,
 सँ कोय थोड़े अनजान ।
 सबभे जानै, सबभे मानै,
 हमरऽ भारत देश महान ॥
 कलकत्ता, मद्रास, बम्बई,
 दिल्ली चारो महा नगर ।
 सबके खूबी अलगे—अलगे,
 तोंय देखऽ ध्यानऽ सँ अगर ॥
 बम्बय बहार, दिल्ली मिनार,
 कलकत्ता मया काली ।
 मद्रास केरऽ स्नेक पार्क छौं,
 साँफे सँ भरलऽ खाली ॥
 बम्बई के अग्निनेता बड़िया,
 मद्रास के माइला पोर ।
 दिल्ली संसद भवन अनूटा,
 बिदेशऽ म' छय शोर ॥
 मैट्रो ट्रेन दूमहला मोटर,
 हाय कलकत्ता के ज्ञान ।
 सबभे जानै, सबभे मानै,
 हमरऽ भार दे महान ॥

ऐलै वसन्त

गोटा फुललै, तोसी फुललै,
फुललै मटरऽ के फूल ।

भेलै जाड़ऽ के अन्त, ऐलै वसन्त
सबके मन करे कबूल ॥

महुआ के डारी कोयल कारी,
मचाब' लगली शोर ।

फूलऽ के मुख चुमी तितली भागै
लागै बड़ी मन जोर ॥

आमों के मंजर रस टपकावै,
बढ़िया गंध सुहावै ।

भौरा के गुन-गुन, बड़ी मधुर धुन,
मन सबके उमगावै ॥

पहिरलक धरती हरीहर साड़ी,
नीला रंग किनारी ।

बीच-बीच कहीं रंग पियरका,
चमकै क्यारी-- क्यारी ॥

सबभे जड़-चेतन मस्त दीखै छै,
ऋतुराज के ऐला सैं ।

जैसें दुखिया धन, अंधा लाठी,
बाँझ पुत्र क' पैला सैं ॥

भौरा

भौरा केरऽ प्यार अनोखा,
 ढेरों कवि गण गैनें छय ।
 प्रेम-पहेली अलि कुल जानै,
 हमरा सब समझनें छय ॥

फूलऽ केरऽ प्रेमी भौरा,
 हरदय फूल प' आवै छय ।
 गड़' भले देहऽ म' कांटा,
 तनिको नै घबड़ावै छय ॥

आंघी आब' या तूफान,
 पड़' चाहे संकट म' प्राण ।
 मिलथै पावै छय फूलऽ सें,
 भौरा जीवन म' परित्राण ॥

हाय प्रेमऽ म' छिपलऽ स्वारथ,
 इ ठो गीत कोय गावै छऽ ।
 मुरझैलऽ फूलऽ पर बैठलऽ
 केतना भौरा पावै छऽ ॥

सब फूलऽ पर झूठे किरिया
 सब भौरा नै खेनें छय ।
 मानव, कीट, पतंगा तक
 कोय नै साथ निभेनें छय ॥

कली खिली, बने जब फूल,
 लगलहों भौरा मँडराब' ।
 उड़ी बल' त' मुड़ी नै ताक'
 लागै फूल जों मुरझाब' ॥
 फूलऽ पर बैठी भौरा क'
 के देखै छऽ गीत सुनैतै ।
 मुरझलऽ फूलऽ पर बैठीं,
 के देखै छऽ प्यार जसैतें ॥
 धर्म ग्रंथ बतलावै छय,
 सुर, नर, मुनि तक केरऽ रीति ।
 बिना स्वारथ के प्रेम कहाँ,
 स्वारथ ताकी सबके प्रीति ॥

अचरज करभो सुनी—सुनी सब
 एक बात अलबत्ता ।
 होरलिवस स' बढलऽ घर—घर के,
 सतू म' गुणवत्ता ॥
 रोजे थोड़ो सा दूध मिल' त',
 सबटा टीनिक बेकार ।
 खाली गरम पानी पीला स',
 केतना रोग फरार ॥

भ्रमण

दक्षिण भारत चष्पा—चष्पा,
 घूमो—फीरी ऐलां ।
 साथी—संगत के संग मिली,
 खूबे मौज मनैलां ॥

बिहार, बंगाल समुचे टप्पी,
 उड़ीसा म' पग धैलां ।
 आन्ध्रा, तामिलनाडू होतें
 आगू केरल गेलां ॥

त्रिचूर, त्रिवेद्रम्, एरना कूलम्
 घूमी मन हर्षेलां ।
 पूर्ण साक्षर केरल नगरी म',
 दू—तीन दिन गमैलां ॥

तारियल तेल म' बनलाऽ सब्जी,
 हाथ सब्भे ठाँ पैलां ।
 चाबल वाला इडली, डोसा,
 बड़ी चाव सैं खैलां ॥

कुमारि कन्या सागर--संगम
 म' जाय खूब नहैलां ।
 बिबेकानंद समाधि ऊपर,
 हम्हें ध्यान लागैलां ॥

सुचिन्द्रम् में बाबा भोले क'

एक—दू फूल चढ़ेलां ।

वाला जी के दर्शन म' हम्हें,

काफी कष्ट उठेलां ॥

गुरुवायुर, पुरी, रामेश्वरम्

सबठां शीश नवेलां ।

कलकत्ता के काली माय क'

खूबे विनय सुनेलां ॥

गीत-गजल गाड़ी पर गाबी,

हँसलां खूब हँसैलां ।

सबभे पूरा यात्रा मस्ती

के माहौल बनेलां ॥

'चेतना' काव्य संकलन में प्रकाशित

यात्रा बड़ा सुहाना लागे,

कहियो करलाऽ जाय ।

केतनी देश—विदेश म' घूमऽ

थोड़े मऽन अघाय ॥

प्रत्यक्ष ज्ञान सुनलाऽ देखी क'

दिल—दिमाग म' होय ।

यात्रा के आनन्द क' हरदम,

स्वीकार' सब कोय ॥

बाबा अजगैबी

अजगबी बाब के महिमा,
 अनुपम, अद्भुत, महान छय ।
 सब धर्म ग्रंथ के पन्ना पर,
 अंकित इनकऽ गुण-गान छय ॥
 धन्य-धन्य सुलतानगंज छय,
 जहां बहै पावन गंगा ।
 जेकरऽ पावन जल सेवन से,
 कष्ट मिटे रोगी चंगा ॥
 ऊ पावन गंगा बीच बसलऽ
 बाबा सब्भे के शान छय ।
 सब धर्म ग्रंथ के पन्ना पर,
 अंकित इनकऽ गुण-गान छय ॥
 उत्तर वाहिनी गंगा के जल,
 बाबा भोले मन भावे ।
 अर्पण करी हाय पावन जल,
 मन वाञ्छित फल सब पाबै ॥
 बड़ा पुण्य अजगैबी दर्शन,
 ओहिनें गंगा स्नान छय ।
 सब धर्म के पन्ना पर,
 अंकित इनकऽ गुण-गान छय ।
 साबन भरी सुलतानगंज म'
 देश-विदेश के भरलऽ लोग ।
 स्वर्ग धरा पर उतरी आवै,
 पाव' सब्भे सब सुख भोग ॥
 जय-जय हो बाबा अजगैबी !
 भक्ति खाली अरमान छय ।
 सब धर्म ग्रंथ के पन्ना पर,
 अंकित इनकऽ गुण-गान छय ॥

बच्चा पढ़ावऽ निरक्षरता भगावऽ

पढ़ैल' भइया भेजऽ आपनऽ ललनमा ।

जेकरऽ कि घरबा म' कोनों नें काम छौंन,

तइयो स्कूली म' कहिनें न' नाम छौंन ।

गुल्ली-डण्टा खेलि-खेलि बिताबै छौंन दिनमा ।

पढ़ैल' भइया भेजऽ आपनऽ ललनमा ॥

पढ़ि-लिखी, ज्ञान सीखी, होथों होशियार हो ।

बदली जंथों चाल-चलन, पुद्धि—बिचार हो

गामों आरु समाजी म' पथों सम्मनमा ।

पढ़ैल' भइया भेजऽ आपनऽ ललनमा ॥

टंगोर, सुभाष चन्द्र, तिलक, गांधी महतमा,

गौतम, महावीर, रंग बनथोंन धरमतमा ।

पढ़लहै- लिखलहै सें होथों सफल किसनमा ।

पढ़ैल' भइया भेजऽ आपनऽ ललनमा ॥

पढ़ि—लिखी देश सेवा करथों भरपूर हो ।

देश में निरक्षरता होय जंतै दूर हो ॥

बचि जंथों दै सें आरु अंगूठा निशानमा ।

पढ़ैल' भइया भेजऽ आपनऽ ललनमा ॥

★ ‘अंग माधुरी’ सितम्बर ६७ अंक म' प्रकाशित

साक्षरता गीत

हे रे नू नू ! पढ़बे त' ज्ञान होती तोरा ।

ज्ञान होती तोरा, सम्मान मिलती तोरा ॥

गाय चरहें भैम चरहें आरु चरहें बकरी ।

कागज चुनीहें, घोंघा चुनीहें चाहे चुनीहें लकड़ी ॥

वही साथ पढ़बें कुछ्छ काम देती तोरा ॥ हे रे ... ॥

क, ख, ग, घ, ङ पढ़बे च, छ पढ़बे जखनी,

खुश होती ताप—माय, मिठाय देती तखनी ।

पढ़ के आनन्दऽ के भान होती तोरा ॥ हे रे ... ॥

आपरेषन विजय

विजय आपरेषन भेलै जारी,

भगइबै सबक' मारी -- मारी ।

मशकोह, द्रास, कारगिल, बटालीक भेलै खाली ।
 पाकिस्तानी संकट म' पड़लै अपनां चाली ॥
 वरणा हम्म' शांति के पुजारी । भगइबै ।
 अटल बिहारी जनता बीच करनै एलान छय ।
 तैय्यार जान दंल' सबभे हिन्दू-मुसलमान छय ॥
 सबक' आपनऽ घरती छय प्यारी । भगइबै ।
 भारी बदतमीज लागै सबमेटा घुनपैठी ।
 तोड़ी देबै मारी -- मारी सबभे केऽ ऐठी ॥
 मिटाय देबै सबके खुमारी । भगइबै ।
 पाकिस्तानी क' सबक अबरी अहिनों मिखइबै,
 खोजी -- खोजी सबक' आपनों सीमा सँ भगइबै ।
 असुर खात्तिर बनबै असुरारि । भगइबै ।

★ दुश्मन के छक्का देबै छोड़ाय,
 जे सीमा पर ऐत' ।
 रगइतै नाक आरु घुनतै साथऽ
 करनी पर पछतैतै ॥

मट्टा पीबै फूकी-फूकी

ठोकर खैलै सँ सम्हरे छय,
चल छय इन्सां झूकी झूकी ।
गरम दूध सँ मुँह जलाय क',
मट्टा पीबै फूकी-फूकी ॥

कलिंग युद्ध के नर संहारे,
अशोक के दिल दहलैलकं ।
विजय लालसा सँ हुनी पहिनें,
मार-काट त' खूब मचैलकं ॥

सन्भे करीये क' सीखे छय,
हम्ही कहिनें जब चूकी ।
गरम दूध सँ मुँह जलाय क'
मट्टा पीबै फूकी-फूकी ॥

दहेज दानव देबे दफनाय,
यन म' सन्भे हाय ठाने छय ।
बेटी घरियां सन्भे बोल म',
बेटा घरियां के माने छय ॥

जे ल' ले छय बोहो बोलै छय,
केना देखबै पेटऽ म' डूकी ।
गरम दूध सँ मुँह जलाय क',
मट्टा पीबै फूकी-फूकी ॥

बाप--दादा केरऽ अरजलका,
 मौज--मस्ती म' खूब लुटैबं ।
 अछैतें चीजें के मानं छय,
 जे हम्हीं तकलीफ उठैबं ॥
 नै रहला पर देखलऽ जेतें,
 सत्तू सानबं थूकी--थूकी ।
 गरम दूध सें मुँह जलाय क'
 मट्टा पीबै फूकी--फूकी ॥

पाकिस्तानी उत्पाती नें,
 जेना हमरा तंग करलकै ।
 हमरो वीर--जवानें सबभै,
 ओन्हें ओकरा संग करलकै ॥

दुष्टऽ क' सबक सिखाना जब छय,
 कहिनें, केनां, जैबै स्की ।
 गरम दूध सें मुँह जलाय क'
 मट्टा पीबै फूकी--फूकी ॥

★ 'अंग माधुरी' सितम्बर १९ अंक में प्रकाशित

★ थम्स अप, कोका कोला सबक'

पहुँचाबै नुरुसान ।

अनजान बनी कहिनें डालै छऽ,

लौय संकट म' प्राण ॥

उखड़ी म' मूड़ी

आय सत्य-अहिंसा, धरम छोड़ि क', मिथ्या क' अपनैलां ।
बड़का—बड़का के लोक लाज हम, सब्भे टा बिसरेलां ॥
बिन मतलब वाला झूठ बात म' झूठे कसमों खेलां ।
झगड़ा—झंझट आरु निन्दा म', बेशी समय गमैलां ॥

सबभै करनी के फल भोगे छय, हम्हें त' जानै छी ।
केकरो कहलऽ कहियो नै राखों, हट अहिने ठानै छी ॥
पछतैला सँ कुछ लाभ छय थोड़े जहिनां करलां भरबऽ
उखड़ी म' मूड़ी देतें छी हम्म' चोटऽ सँ कत्त' डरबऽ

मारीच खूब समझाबै, रावण भेतऽ आग बबूना ।
बुद्धिमान बनै छय एखे लाती फाँक' क' लागभ' घूला ॥
हाय कहै छिहों जे बात अही म' छौन तौरऽ कल्याण ।
उलटा—पुलटा जों पाठ पढ़ैमो, ऐसैं जंघों प्राण ॥

बसतर वाला मार जों मारीच, कर' याद बबड़ाय ।
रावण के हाथें प्राण गँवाना, अनुचित यदो लखाय ॥
सुनिश्चित आजै मरण चलौ तब राम वाण सँ मरबऽ
उखड़ी म' मूड़ी देतें छी हम्म' चोटऽ सँ कत्त' डरबऽ

कहै मन्दोदरी दसकंधर सँ हठ नै स्वामी ठानऽ
श्री राम चन्द्र परमेश्वर छेकै, तोंय इ बात क' मानऽ
खरदूषण आरु कुम्भकर्ण सब, क्षण म' गेलै जानऽ
तोंय जानी—बूझी क' प्राण नाथ! कूइयों अब नै खान्हऽ

मन्दोदरी एकदम अजामी छऽ, बोलै तब लंकेश ।
हाय रंग दूत के बनवासी क', जे दै छी संदेश ॥
भगवान छेकै त' बड़ी बढिया, ओकरे हाथें तरबऽ
उखड़ी म' मूड़ी देतें छी हम्म' चोटऽ सँ कत्त' डरबऽ

हड़ताल करे छी, खूब लड़े छी, सब्भे सरकारऽ सें ।
 वाजीब मांगे म' कत्त' केना डरते तकरारऽ सें ॥
 ससपेण्ड छोड़ि डिसचाज के धमकी सुने छी कत्त' भाय ।
 अहिनों गीदड़भौली सें जेबे थोड़े सब घबड़ाय ॥
 मांग पर डटबे, जरा नै हटबे जे करते सरकारें ।
 जे वादा खिलाफी उ की बोलत, मना लाज के मारें ॥
 सरकार क' जे करना छय करत, हमरा जे छय करबऽ
 उखड़ी म' मूड़ी देने छी हम्म' चोटऽ सें कत्त' डरबऽ

आय पढ़े - लिखे के युग जमाना, आबी गेले भारी ।
 परीक्षार्थी सब परीक्षा खातिर, कर' खूब तैयारी ॥
 खर्चा-बर्चा म' हमरऽ गार्जन, कऽर कसर नै करलक ।
 तइयो सब कोय पढ़े म' लागे, हम्म' जोगी खेसाड़ी ॥
 ओयझे ताम के अड्डा जमके, जो कोय देखें लोगें,
 कहलक तोरा पढ़ना छौ थोड़े, यह' खेसाड़ी जोगें ।
 सबकोय करते पासे देखबै, फेल त' हम्म' करबऽ
 उखड़ी म' मूड़ी देने छी हम्म' चोटऽ सें कत्त' डरबऽ

विद्यलय कहियो महीना-खाड़े घूमलऽ फिरलऽ जाय छी ।
 गामों के लोग कुछू बोलै छय हम्म' त' गम खाय छी ॥
 छोटका, मोटका ओफिसर सबक, थोड़े जी लगाय छी ।
 बड़का-बड़का के पारी ऐल्हों, दै ल' क' फड़ियाय छी ॥
 साथी-संगत सबमें समझैयों, पड़भ' तोंय फेराम' ॥
 जहिया एभ' कोय ऊपर वाला, ओफिसरऽ के घेराम' ॥
 देखलऽ जेत विद्यलय म' रोजे, सोमे दिन कत्त' सड़बऽ
 उखड़ी म' मूड़ी देने छी हम्म' चोटऽ सें कत्त' डरबऽ

भागले सभ अंग्रेज, अंग्रेजियत हमरऽ कहाँ छय गेलऽ
सामान विदेशी, बढिया बेंशी, लाग' हमरा लैलऽ
कोलगेट मंजन, साबुन ललका, पीयऽ कोका कोला ।
घड़ियो, रेडियो, टो०भी० विदेशी, लाग' छय अलबेला ॥

एकरा बिनु शान-गुमान को रहतै, देखऽ जरा बिचारी ।
लोगें कहथौं, गुलामीये ऐथौं, ओकरे इतय्यारी ॥
कहै छऽ ठीकके देखलाँ आजादी, गुलामी देखो मरबऽ
उखड़ी म' मूड़ी देन' छी हम्म' चोटऽ सें कत्त' डरबऽ

चुनाव के मौसम ऐलहों जहिया, घूमऽ गांव-मुहल्ला ।
हमरा मवभें क' देखी मचैथों, जमता खूबे हल्ला ॥
कोय कहथौं हाय मब छौ लुच्चा, जीती क' जब जीती,
देहाती जनता के खोज-खबर सैल' भला इ ऐती ॥

कोय कुछ मांगै, कोय गरियाबे, कोय पिलैथों चाय ।
मब पाटो वाला अगुआ—पिछुआ, देखौं खूब दोहाय ॥
चलऽ जीती क' जैभौं, सभे देभौं, बाबा करी टुषराबऽ
उखड़ी म' मूड़ी देन' छी हम्म' चोटऽ सें कत्त' डरबऽ

छट्टी रात लिखलक जे विधाता, हाव के मेहनहार ।
केतनों नाक रगड़तै कोइये, होतै जे होनहार ।
सच्चा हाय ठो दुनिया 'म' जब छे, हाय—हाय बेकार ।
बिना कमेंते भेटथौंन सब जौं, लिखलऽ होतै लिलार ॥

समझाबै लोगें अन्नौं खातिर, पेटो भूखें जरतो ।
हाथऽ पर हाथ राखी क' बठबे, पेट कहाँ स भरतो ॥
जेकरा जे बोलना छौंन बोलऽ, केकरऽ रस्ता धरबऽ ।
उखड़ी म' मूड़ी देन' छी हम्म' चोटऽ सें कत्त' डरबऽ ॥

वोट

वोट गिरायल गेलां जखनी,
दू-चार हीरो ऐलः तखना ।
कहलक तोरऽ गिरलहों वोट,
सुनी क' हमरा बड्डी कचोट ॥

देखलीं ठाढ़ऽ बन्दूक घारी ।
बैं की देतँ सब्भं क' मारी ॥
यही खेतऽ के वोहो मूली,
रहै छव सबस' मीली-जूली ॥

हाय प्रजातंत्र ऐलं कौन
करे छय वह' जेकरऽ जे मॉन ।
वोटो केरऽ अब नं अधिकार,
कहिनों होतँ हाय सरकार ॥

हाइह' छेलं बापू के ख्वाव !
लूट-पाट करी बनें नबाव ।
अखनी कटतिथै उनको नाक ।
भल्लहै मुनलके तहिये आंख ॥

भाबी गेलें यहुँ घोटाल ।
जपं कर्मचारी सब माला ॥
काम छोड़ी क' वोट गिरायल'
फेनुँ ऐब की देतऽ खायल' ।



चुनावी माहौल

माहौल चुनावी जहिया ऐथों,
उम्मेदवार सब द्वारी प' जैथों ।
जोड़थों सब्भे के आगू हाथ ।
चाहे तोंय मारऽ ओकरा लात ॥

हँसी क' देखों अहिनों टारी,
दुधार गाय के जेना लताड़ी ।
बड़ी मोटुऽ लागथों तोरऽ बोली ।
केतनों मारभ' बात के गोली ॥

हँसी क' बोलथों दुर्जन नांकी ।
कहीन' कहना जेतना छौं बांकी ॥
कोय कहै लुच्चा, कोय बेइमान,
ऐकरा जिम्मा छौं झूटुऽ के खान ।

जीती क' जैथों, घुरी नें ऐथों,
पटन्हैं दिल्ली म' दिवस गमैथों ।
इठलैथों चलथों टेढ़का चाल ।
प्यादा सं फरजी वाला छौं हाल ॥

सब्भे नेता म' एक्के बीमारी,
आपन्हें म' करथों मारा-मारी ।
षाटीये रोज बदलथों खालो,
हरदम खोजथों दूध के छाली ॥

जेकरा घर नें मिले खेसाड़ी,
हाव पागल छौं पीबी क' ताड़ी ।
करथों की बें देश के सेवा,
खोजे छौं जीने माखन-मेवा ॥

महिमा एकरऽ बड़ी अगम-अपार ।
 बनी जाय कहीं एकरऽ सरकार ॥
 फूली क' होथौ आखारी बेंग ।
 फेह को धरथौ धरती पर टेंग ॥

एकरऽ घर भरथौ हीरा-मोती ।
 हमरऽ के देखत फटलका धोती ॥
 आपनऽ घर-आंगन स्वर्ग बनैतऽ
 बीबी-बच्चा संग मौज मनैतऽ

कथोल' ऐतऽ देहात इलाका ।

छोड़ी पटना, भागलपुर, बांका ।

फेरु हाय दर्शन तहिया होथौ,

माहौल चुनावी जहिया ऐथौ ॥

★ 'बगुला' अंक(२) १९६६ में प्रकाशित

होनी

होनी त' होइये क' रहथौंन, हाय सच त' मानै छी ।
 करनी करी लिखलका मेटै, हाइहो त' जानै छी ॥
 सावित्री—सत्यवान आरु सती बिहुला के बात,
 पति दान केनां क' पैलकै, सुनथैं छियै दिन—रात ।
 तइयो द्वारी बैठी—बैठी, पूरा समय गँवाना,
 अहिनें आदमी क' होथैं छय, मुश्किल पेट चलाना ॥
 भाग्य भरोसें बनी निकम्मा, काम—राज मटियैतै,
 ओकरऽ संकट बढ़ले जेतै, कहियो नै सुख पैतै ।
 होना जे छय होबे करतै, मेहनते हमरऽ काम ।
 मेहनत के फल मीठऽ होय छय, जेनां पकलका आम ॥

★ 'नालन्दा दर्पण' अगस्त २००० में प्रकाशित



साँपऽ छुछुनरी वाला छऽ हाल

हमरा घरें ध्याहैल' बेटी ।
 राखलौं किनी बबसा-पेटी ॥
 जेकरा घरें बेटा जवान,
 ओकरऽ देखभो अलगे शान ।

खोजौं सौंसे जाय इलाका ।
 सब्भें मांगे पूरे टाका ॥
 बीस हजार बीघा छौं डाक ।
 तभीये बजथौं तुतरु ढाक ॥

चपरासी के मांग छौं बाख ।
 ओकरा सें आगू जैभ' खाक ॥
 मांग साइकिल, रेडियो, टी-भी ।
 नोटऽ ल' थैला राखलऽ सीबी ।

कहाँ सें लानबऽ हेत' सामान
 घुरी-फिरी बैठे छी जमान ॥
 करौं दम नै, छोड़तें मलाल ।
 साँपऽ छुछुनरी वाला छऽ हाल ॥

अगुआ के तोंय बात नें बोलऽ
 उनका आगू बात जौं खोलऽ
 भरी धो उनकऽ पहिनें थैला ।
 नापी ओन दस-पांच पैला ॥

रुपया-पैसा कुछ घरऽ म' दहो ।
 बाल जे कहथौं सब्भे सहो ॥
 सब' वें कोय जूत लगथौं ।
 झूठ-सांच सब बात बनैथौं ॥

जों कहीं उनकऽ बात नें मानऽ
 आपनऽ जीह जहां कोय ठानऽ
 बैठलऽ बात देखीं उखाड़ी ।
 बनलऽ काम क' देखीं बिगाड़ी ॥

करै म' बनथौन नें छोड़ै म',
 बड़ी मुश्किल रिस्ता जोड़ै म' ।
 येन्है बीतलऽ केतना साल ।
 सांपऽ छुछुनरी वाला छऽ हाल ।

दहेज—दानव मुँह छें बनें ।
 बें मानतै बिना कुछ खनें ॥
 शिक्षा जेतना आगू बढ़लै,
 ओतनें ऊपर मांगो चढ़लै ॥

सोचलां बेटी क' दीं पढ़ाय ।
 स्कूली म' देलां नामों लिखाय ॥
 ध्यान धरी पढ़ेलां - लिखेलां ।
 बड़ो जतन स' काबिल बनेलां ॥

पढ़ली बेटी ल' पढ़लऽ जमाय,
 जों नें करै छी होतऽ हँसाय ।
 षढ़लका खोजै म' भटकै छी ॥
 मांग—चांग सुनी दटकै छी ।

मुरूख रहती, मूर्खों स' करतां ।
 कथील' हेत' खोजं म' मरतां ।
 झूठे पढ़ाय म' भेलां पेमाल ।
 सांपऽ छुछुनरी वाला छऽ हाल ॥



वाजीव बात

वाजीव बात खिलैथों लात,
जों ऊ बात छोन तीक्ख ।
बढ़िया बोलीं मिश्री बोली,
बोलैल' सब कोय सिक्ख ॥

वाजीव बात बापऽ क' कहबै, हाय एकदम बेकार ।
वाजीव बोलै वाला देखऽ करथें रहथों तकरार ॥

दू ठो लड़का, वोय म' वड़का, पनभरनी लेगां जाय,
बोललै प्मासैं कण्ठ सुखै छऽ, मैया द' पानी पिलाय ।

बड़ा प्रेम सें ऊ पनभरनी,
ओकरा पानी पिलाव' ।
छोटखौं टेबी बढ़िया मीका,
जट, बड़िये गीत मुनाव' ॥

है-हे हमरा बापऽ के बहू ! हमरही पानी पिलाबऽ
हाथ जोड़ी क' अर्ज करै छी, हमरही प' दया देखाबऽ

मुनथें आग बबूला भेली, हाव ह' पन भरनी माय ।
वाल्टी—वाल्टी मारी—मारी, देलकै प्यास बुजाय ॥

मुनला म' जे अच्छा नें लाग
हाव ठो सच क' ठुकराबऽ
वाजीव जों उस्सठ लाघों त'
ओकरही दूर भगावऽ ॥



जों तोंय चाहऽ

जों तोंय चाहऽ बिना इलाजें,
 सबटा रोग भगाब',
 जों तोंय चाहऽ बिना कमैनें
 धन-संपत घर आब',
 बिन काबिल, बिन घूस जों चाहऽ
 नौकरी तोंय पाब',
 हसलऽ प्रेमी के संग चाहऽ
 जों यदि रास रचाब',
 अगर तोंय चाहऽ छूमंतर म'
 जीत' केश मुकदमा
 अगर चाहै छऽ घड़ी-घण्टा म'
 भेटाब' सब सदमा
 भाग्य भरोसे बनी निकम्मा,
 बैठी ध्यान लगाबऽ
 जंतर-मंतर, जादू-टोना,
 सब्भे तोंय अपनाबऽ
 तांत्रिक लग तोंय जाय क' रगड़ऽ
 आपनऽ-आपनऽ नाक ।
 ग्रह काटी सब काम बनैथों,
 खुल थोंन तोरऽ आंख ॥



बुड़बक के घऽन

नौकरी म' घूस दू लाख देलौं ।
 विहार पुलिस के नौकरी पलौं ॥
 बंच आरू वदो पहिनें देलकऽ
 कागज पर योगदान कर बैलकऽ

वेतन आरू भत्ता मिल' लागलऽ
 बेरोजगारो माथा सें भागलऽ
 ठाम्हेँ आबी गेलहों करैल' चेक ।
 खूब खिलैलिहों आमलेट-केक ॥

खाय-खाय खूब बड़ाय करलखौं ।
 जाय क' औफिस क' गज भेजैलखौं ॥
 कागज म' लिखलखौं हमरऽ छटनी ।
 बुड़बक के घऽन होशियारऽ के चटनी ॥

एक दिन दू ठो बिलैया मोटी,
 कहूँ सें पलकी तीन ठो रोटी ।
 बांटे घरी कर मारा—मारी ।
 एक बंदर देखे खूब निहारी ॥

तरजुआ लेन्है ऐलै बंदर ।
 भरलऽ घात रहै जेकरा अंदर ॥
 आधा-आधी बांटे म' खलकै ।
 झगड़ा के फऽल बिलैया पेलकै ।

बोललै दोनों अब नें बटबैबऽ
 बचलका आपन्है बांटी खंबऽ
 बंदर बोले हाय हमरऽ छटनी ।
 बुड़बक के घऽन होशियारऽ के चटनी

बेरोजगारी मिटइबै

स्वदेशी केरऽ करी परचार हो,

बेरोजगारी मिटइबै ।

हमरऽ सबके दुश्मन विदेशी कम्पनियाँ ।

रोजी रोजगार धिनी दै छय गर्दनियाँ ॥

करबे हम ओकरऽ बहिष्कार हो

बेरोजगारी मिटइबै ।

वें चौपट करै छय पुस्तैनी सब धन्धा ।

विदेशी कम्पनियाँ डालै एहिनी फन्दा ॥

कहाँ मिलै कोनों रोजगार हो,

बेरोजगारी मिटइबै ॥

जूता, चप्पल गाँव के बनलाका पहनबैं ।

टौनिक के बदला दहीं, दूध खँइबैं ॥

तब गामों के होतै उद्धार हो,

बेरोजगारी मिटइबै ।

बूटऽ के सत्तू आरु बेशन बनइबैं ।

हम साबुन बनाइक' घर-घर म' चलाइबैं ।

बनइबैं हम पापड़-अचार हो,

बेरोजगारी मिटइबै ॥

गोबर वाला खादऽ सँ फसल उगइबैं ।

बनाबैला खाद सब किसान्हों क' जगइबैं ।

करऽ सपना स्वदेशी साकार हो,

बेरोजगारी मिटइबै ॥

★ ‘अंग माधुरी’ दिसम्बर ६६ अंक में प्रकाशित ।

स्वदेशी सपना

ऐलऽ छेलं विदेशी भारत,
 पहिनें कर' व्यापार ।
 बैठ केरऽ जब मिललं जग्घऽ
 देलके टांग पसार ॥

देखनें—देखतें शासन सत्ता,
 लेलकऽ आपनऽ हाथ ।
 फेरु जे सबके दशा पुरेलक,
 कहै के नैं छौं बात ॥

ओकरऽ सत्ता उखाड़ै म' त'
 वापू जी परेशान ।
 केतना जान गमैलक हमरऽ
 देश के वीर—जवान ॥

जे पैलक दुश्मन के संज्ञा,
 ओकरऽ बात न्यारी ।
 हाय देखैं छी दुश्मन रहलऽ
 फेरु टांग पसारी ॥

जगथें हम्मैं सब खीजैं छी,
 कोलगेठ दुध पेस्ट ।
 चाय विदेशी सबसैं पहिनें,
 जेन्हें ऐहौं गेस्ट ॥

लिफ्टन टाइगर, गुडरिक, टाप,
ताजमहल छौं नाम ।
वोय साथें ब्रिटैनिया बिस्कट
बिना की चलथों काम ॥

रेडियो, टी० भी०, घड़ी विदेशी,
हाय सब हमरऽ शान ।
पेप्सी, कोका कोला पीबी,
भारत देश महान ॥

चढ़लऽ जाय छौं रंग विदेशी
हमरा ऊपर आय ।
विदेशी एक दिन रंग जमैथों,
मान्हो सच्चा भाय ॥

आबी गेलै कम्पनी विदेशी,
दोनों भुजा पसार ।
होलऽ जाय छौं बन्द घरेलू,
सब रोजी---रोजगार ॥

बहुराष्ट्रीय कम्पनियाँ ऐलऽ
नेता सब खुशहाल ।
देश के जनता भूख मरै छय,
काम बिना कंगाल ॥

बापू जी के स्वदेदी सपना,
 भेलौ चकनाचूर ।
 विदेशी के चंगुल में तड़पै,
 सब किसान मजदूर ॥
 सोछो भैया अभियो सबभैं,
 विदेशी क' ठुकराबऽ
 घर के काम, खानदानी पेशा,
 आपनऽ सब अपनाबऽ
 बढिया घटिया जहिनों भी छय,
 स्वदेशीं हमरऽ शान ।
 स्वाबलम्बी होलहै स' आपनऽ
 भारत देश महान ॥

★ ‘अंग प्रिया’ मार्च ६६ अंक में प्रकाशित

स्वदेशीं अपनाबऽ हो भैया ! स्वदेशी अपनाबऽ ।
 देश के दुश्मन सदा विदेशी, ओकरा सब ठुकराबऽ ।
 धन्य छय आपनऽ देश के माँटी, आरु गंगा पानी ।
 जेकरऽ सेवन सँ भागै छय, देहऽ के परेशानी ॥



स्वदेशी अपनाबऽ

सुनऽ—सुनऽ द' क' ध्यान ।

स्वदेशी अपनाना बड़ा काम छय महान ।
कोका कोला, पेप्सी, लिप्टन के टाइगर टी ॥
क्रिस्टल, फ्लोरा, वाइटल, सनड्राप, डालडा घी ॥
सनलाइट, सर्फ, एरिथल, विदेशी सामान ।

सुनऽ—सुनऽ द' क' ध्यान ॥

विमको, टिक्का आरू होमलाइट, शिप सलाय,
लक्स, लिरिल, डेटोल, रेक्सोना, लाइफ बॉय,
बेप्मोडेण्ट, कालगेटे क' समझऽ नैं शान ।

सुनऽ—सुनऽ द' क' ध्यान ।

आपनऽ देशी साबुन कौनों नैं छय बेकार ।
चन्द्रिका, चन्दन, कुमकुम, नीम, रोज, केशनिखार ॥
निरमा बाथ, स्वास्तिक आरू ब्यूटो अफगान ।

सुनऽ—सुनऽ द' क' ध्यान ॥

देशी लाले मंजन, लेजर, अशोक, टोपाज,
बिस्कुट पालको, पारले, अप्तारा, मेघराज ।
वनस्पति गगन, धारा, रथ, गोपी, हनुमान ॥

सुनऽ—सुनऽ द' क' ध्यान ।

जीप टार्च, बैटो, सूर्या, एंकर आरू बजाज ।
इमामी, प्लस, फेना, हरबल की कम छय आज ॥
दही, दूध, लल्सी, मट्टा पर हमरा अभिमान ।

सुनऽ—सुनऽ द' क' ध्यान ॥

शिक'काई आगू मेडिकेयर छय बेकार ।
घटिहै चीजऽ के टो० वी० करे छय परचार ॥
अपनाबऽ छोड़ी नैगी, इण्डाना, प्रिया, पान ।

सुनऽ सुनऽ द' क' ध्यान ॥



परिवार नियोजन

बीसवीं सदी के अन्तिम वर्ष,
 ग्यारह मई गुरुवार,
 एक बजे के बाद जनसंख्या,
 हौलै अरब सें पार ।
 देश केरऽ ज्ञानी—विज्ञानी,
 करे छय खूब बिचार ।
 हाय धरती हेतना लोगऽ के,
 केनाँ क' सहतै भार ॥
 जनसंख्या केरऽ नियत्रण ल त'
 सोचै खूब सरकार ।
 देश के जनता नै जगतै त',
 सोचलऽ बात बेकार ॥
 अभियो जों मटियेथै रहभों,
 देश रसातल जैतै ।
 दोष नाग हेतना बोझऽ सें,
 थोड़े नै औक्तैत ॥
 अपनाभो परिवार नियोजन,
 देश के दशा मुधारऽ ।
 अपनाँ हाथें काम जे होतै,
 दोसरा पर नै टारऽ ॥



भावना

चाँद हँसे छय की कानै छय,
इ कोइये थोड़े जानै छय ।
आपनऽ सुख—दुख साथें सबभैं,
ओकरा त' एन्हैं सानै छय ॥

घरतो के परिकरमा करना,
नैं केकरहौ देखी क' जेरना,
भला-बुरा के भेद छोड़ी क'
विपदा सबभैं जन के हरना ।

हाय परोपकारी दुनिया म'
ऊँच-नीच नैं पहिचानै छय ।
चाँद हँसै छय की कानै छय,
इ कोइये थोड़े जानै छय ॥

विरह के आग म' जे जललऽ छय,
चिन्ता म' जे वेशी गललऽ छय,
लाख छानै छय खाक मगर,
नहींयें कुछ संकट टललऽ छय,

आपनैं दुख सें दुखी चाँद क'
लोर चवैतें बें मानै छय ।
चाँद हँसे छय की कानै छय,
इ कोइये थोड़े जानै छय ॥



अबरी झरियाँ लेलकै जान

झरिया अबरी अहिनों पड़लै,
 बूटो, गेहूँ खेथें सड़लै ।
 खेसाड़ी, रेंचा एन्हें गेलऽ
 मौसरी, चिकना गोबर भेलऽ
 गेहूँत सबसँ पहिनें धान ।
 अबरी झरियाँ लेलकै जान ॥

तोड़ै गाछ आमी के मंजर । हवा चलाबै अहिनों खंजर,
 गाछी म' झलकै कहूँत आम । भूललऽ सब्भे आमी के नाम ॥
 खैलकै अबरी सब तूफान । अबरी झरियाँ लेलकै जान ॥
 पर्यावरण प्रकृति बिगाड़ै । रोजे-रोजे गाछ उखाड़ै ॥
 ओकरा सँ पेतऽ कौनें पार । ओक । सँ करतऽ कौनें मार ॥
 पछतावै घर बैठी किसान । अबरी झरियाँ लेलकै जान ॥

जोन-कोड़ के नै दै मौका ।
 जेठ—बैसाख चलाबै नौका ॥
 बीचड़ऽ-ब्रौग नै बून' दै छय ।
 घास—फूस नै चून' दै छय ॥
 अछार के सब करै जुगान ।
 अबरी झरियाँ लेलकै जान ॥

मुख-रुक्खऽ जेन्हें हुवै धरतो, बौड़ खेत जोतल परती ।
 हुषड़' सँ ऐलहों अबर-बौखी, देखौ सबक' एकदम हौकी ॥
 तोड़थौ जे छऽ सीना तान । अबरी झरियाँ लेलकै जान ॥
 बीचड़ जे कि परिये देलकै । झगड़ा मोल झरिया स' लेलकै ।
 रोजे खेतऽ म' मरथों पानी । चलथों नै तोरऽ मन मानी ॥
 उपलऽ जाय-जाय शान-बिहान । अबरी झरियाँ लेलकै जान ॥

आरति गीत

सब हिली-मिली के नारायण की
 आरति हम आज उतारै छी ।
 आरति हम आज उतारै छी,
 हम आपनऽ अरज सुनावै छी ।
 आरतहर आरत हरण करऽ
 भारतजन शोर मचावै छी ।
 अपने कर सुन्दर थारिलिये,
 आरु बाति कपूर की बारिलिये ॥
 भय भंजन भव भय दूर करऽ
 हम बार—बार गोहरावै छी ।
 प्रभु अरण में भक्त जे आये कमी,
 यहां मन वांछित फल पाये सभी ।
 दुख—दर्द—बारिद्वय दूर करऽ
 दुखी जन आज पुकारै छी ॥

भोला के दुअरिया

भोला बाबा तो हेरो दुअरिया ॥
 अरजिया करै हो लोगबा ।
 दूर देशवा से आके तोहरो नगरिया,
 कन्धवा पे लेके भरी-भरी के गगरिया ।
 कहिया भोला हेरभो नजरिया । अरजिया करै हो लोगबा ॥
 कितने बड़े—बड़े आई के दुखिया,
 बमके जात यहां से सुखिया ।
 हमरा बेरी खोजिहो केबड़िया । अरजिया करै हो लोगबा ॥
 अक्षत, चन्दन, बेल की पाती,
 ले—ले अरज सुमाये दिन—राती ।
 पहिरे बसन केशरिया । अरजिया करै हो लोगबा ॥

कवि हीरा प्र० हरेन्द्र एक परिचय

- कवि, गीतकार, नाटककार, कहानीकार, मिलनसार प्रतिष्ठित हिन्दी आरु अंगिका के रचनाकार सरस्वती के वरदपुत्र श्री हीरा प्रसाद हरेन्द्र जी क' अंगिका के द्वारी पर नै बंगना म' हादिक अभिनन्द करै छी । यह' रंग हुनी अंगिका के साहित्य मण्डल क' भरतें रहै, अंगिका क' गोख दितें रहै । रचनाकार के परिचय त' हुनकs रचनें स' होय छै । दंगली शुभ कामना के बाद हम्म' कवि हरेन्द्र जी के भोतरिया परिचय भी करना जरूरी समझै छी ।

जन्म तिथि—6—9—1950 (कटहरा, मुलतानगंज)

पिता—स्व० विभीषण प्रसाद (भागलपुर)

सम्प्रति—प्रधानाध्यापक प्राथमिक विद्यालय अराजी दो स्तनी गोराडीह, भागलपुर

सम्मान बारो प्रशस्ति पत्र—

प्रमति शील लेखक संघ एवं यात्रा द्वारा प्रशस्ति पत्र प्राप्त, विन्नमशिला हिन्दी विद्यापीठ ईशीपुर, बाराहाट द्वारा (कविरत्न) उपोध्य से सम्मानित ।

रचना प्रकाशित पत्रिकाएँ—वाल प्रभात, अंग माधुरी, शिक्षा लोक, अंगप्रिया, नई आजादी उद्घोष, जगरण, बगुला, क्रान्ति पुत्र अंगी प्रभा, नालन्दा दर्पण, नई बात, कहीं और सबेरा, (संकलन) चेतना (संकलन) तथा एलेक्ट्रो हेमियो किरण आदि पत्र—पत्रिका आरो मंच प्रसारित एवं प्रकाशित नया साल २००१

रामावतार राही

[सम्पादक बगुला]

★ पुस्तक प्राप्ति—क्रान्ति पुत्र परिवार [मुलतानगंज]